



PERLEMBAGAAN NEGARA BRUNEI DARUSSALAM

PEMASYHURAN DARURAT



**KEBAWAH DULI YANG MAHA MULIA PADUKA SERI
BAGINDA SULTAN DAN YANG DI-PERTUAN
NEGARA BRUNEI DARUSSALAM**

Bismillahir Rahmanir Rahim, Alhamdulillah Rabbil 'Alamin, Wassalatu Wassalamu 'Ala Saiyidina Muhammad Wa'ala Alihi Wasahbihi Ajma'in.

BAHAWASANYA adalah diperuntukkan di bawah Fasal (1) Perkara 83 dari Perlembagaan Negara Brunei Darussalam (selepas ini disebut sebagai "Perlembagaan"), bahawa jika pada pendapat Kebawah Duli Yang Maha Mulia Paduka Seri Baginda Sultan dan Yang Di-Pertuan bahawa akan berlaku, terdapat atau telah timbul suatu kejadian darurat atau kejadian yang membahayakan orang ramai yang dengan kerananya keselamatan atau kehidupan ekonomi Negara Brunei Darussalam, atau mana-mana bahagiannya, adalah atau mungkin terancam, sama ada oleh peperangan atau serangan dari luar atau kekacauan dalam negeri, yang sebenarnya atau yang diancam, maka Baginda boleh dengan Pemasyhuran (selepas ini disebut sebagai suatu "Pemasyhuran Darurat") mengisytiharkan suatu keadaan darurat sama ada bagi seluruh Negara Brunei Darussalam atau dalam bahagian Negara Brunei Darussalam sebagaimana yang mungkin dinyatakan dalam Pemasyhuran Darurat itu;

DAN BAHAWASANYA pada 6 haribulan Safar, Hijrah Nabi Muhammad Sallallahu Alaihi Wassalam, seribu empat ratus dua puluh tujuh bersamaan dengan hitungan Masihi 6 haribulan Mac, tahun dua ribu enam, Beta telah MENGISYTIHARKAN DAN MEMASYHURKAN keadaan darurat dalam Negara Brunei Darussalam;

DAN BAHAWASANYA adalah diperuntukkan di bawah Fasal (2) Perkara 83 dari Perlembagaan bahawa Pemasyhuran Darurat tidak boleh berkuatkuasa lebih dari 2 tahun, akan tetapi Kebawah Duli Yang Maha Mulia Paduka Seri Baginda Sultan dan Yang Di-Pertuan berhak mengeluarkan satu lagi Pemasyhuran sedemikian apabila atau sebelum tamatnya tempoh itu;

DAN BAHAWASANYA adalah diperuntukkan di bawah Fasal (2A) Perkara 83 dari Perlembagaan bahawa dengan tidak menghiraukan Fasal (2) Perkara 83 dari Perlembagaan, Kebawah Duli Yang Maha Mulia Paduka Seri Baginda Sultan dan Yang Di-Pertuan boleh dengan satu lagi Pemasyhuran sedemikian mengisytiharkan pemberhentian suatu keadaan darurat bagi seluruh Negara Brunei Darussalam atau dalam bahagian Negara Brunei Darussalam sebagaimana yang mungkin dinyatakan dalam Pemasyhuran itu sebelum tamat tempoh 2 tahun;

DAN BAHAWASANYA pada fikiran BETA bahawa akan berlaku, terdapat atau telah timbul suatu kejadian darurat atau kejadian yang membahayakan orang ramai yang dengan kerananya keselamatan atau kehidupan ekonomi Negara Brunei Darussalam, atau mana-mana bahagiannya, adalah atau mungkin terancam;

OLEH YANG DEMIKIAN MAKA, BETA, SULTAN HAJI HASSANAL BOLKIAH MU'IZZADDIN WADDAULAH IBNI AL-MARHUM SULTAN HAJI OMAR 'ALI SAIFUDDIEN SA'ADUL KHAIRI WADDIEN, RAJA DAN KEPALA BAGI DARJAH KERABAT MAHKOTA BRUNEI, Sultan dan Yang Di-Pertuan Negara Brunei Darussalam serta sekalian Jajahan Takluk Rantau dan Pesisirnya;

Dengan ini MENGISYTIHARKAN DAN MEMASYHURKAN mulai dari hari ini keadaan darurat dalam seluruh Negara Brunei Darussalam;

DAN dengan ini MEMBATALKAN Pemasyhuran Darurat yang telah disebut tadi yang diperbuat pada 6 haribulan Safar, Hijrah Nabi Muhammad Sallallahu Alaihi Wassalam, seribu empat ratus dua puluh tujuh bersamaan dengan hitungan Masihi 6 haribulan Mac, tahun dua ribu enam.

Demikianlah Pemasyhuran Darurat.

Barang dirahmati Allah Subhanahu Wata'ala Malikul Mulk dan diberkati Nabi Muhammad Sallallahu Alaihi Wassalam akan Pemasyhuran ini. Amin Ya Rabbal 'Alamin.

WARTA KERAJAAN NEGARA BRUNEI DARUSSALAM

Diperbuat di Istana Nurul Iman, Negara Brunei Darussalam pada 6 haribulan Muharram, Hijrah Nabi Muhammad Sallallahu Alaihi Wassalam, seribu empat ratus dua puluh sembilan bersamaan dengan hitungan Masihi 15 haribulan Januari, tahun dua ribu lapan, iaitu tahun yang keempat puluh satu Beta di atas Takhta Kerajaan.

DENGAN TITAH PERINTAH

DATIN PADUKA DAYANG HAJAH SALBIAH BINTI
HAJI SULAIMAN
Setiausaha Tetap,
Jabatan Perdana Menteri,
Negara Brunei Darussalam.